

摘藻堂四庫全書薈要

集部

欽定四庫全書薈要卷一萬六千九百六

集部

空同集卷十五

明 李夢陽 撰

五言古七

祫祭頌述

弘治十八年歲除日作是時武宗初即位

嗚呼大聖人肇迹或漁樵蒼龍戢其角志固無丹青德
祖始側微濬葉開皇朝禮蓋視后稷面南統羣昭大哉

九廟義親盡敢不祧再遷及皇熙世室閔以寥袷辰復
來集鳳皇鳴簫韶惟皇率百辟孔祀自今朝白日照寶
旂御氣如絳綃將將磬筦鳴颯颯靈旗飄恍惚帝醉飽
諸王亦飄颻下有開國勲偃蹇羅金貂愚臣叨對越精
魄為之搖鼓鐘送羣公玉戶風蕭蕭唐侯昔踐位十八
號神堯皇秉敷默龍性無逍遙道合天人際志與
神明超降祉倘冥漠四海無征徭

清廟篇

巖廊肅文欽芳區恣幽騁寬紂豈異性拘曠本殊境欽
岑路寢東森疎嘉樹靜珍叢媚朱夏秀幹揚修景曳裾
羣彥集柱笏萬慮屏仰望南城苑飛除帶崇嶺嵒峯白
玉閣要眇黃金井季主飾觀眺哲王擯遊幸自非淵聖
姿誰保天步永

丙寅元日朝退有作

赫赫大明朝皇皇啓八葉諒闇在冲齡憂勤繼洪業真
人改革殊屢覩禎祥協春王肇元載萬國咸臣妾端冕

御茲辰縹緲仙雲接神飈翊紫蓋翔龍舞浩劫哲后畏
天威惕若春冰涉古編昭日星有躅尚可躡大哉五始
義允矣三陽浹

從軍

漢虜互勝負邊塞無休兵壯丁戰盡死次選中男行白
日隱磧戍胡沙慘不驚交加白骨堆年年青草生開疆
慙未已召募何多名蕭蕭千里烟狼虎莽縱橫哀哉良
家子行者常吞聲

其二

從軍日已遠，備茲途路艱。
驅車太行道，北度鴈門關。
天寒雨雪凍，指墮曾冰間。
登高望虜境，白沙浩漫漫。
單于數百騎，飄颻獵西山。
殺我烏玉弓，赫然熱肺肝。
安得奮長劍，一繫名王還。

其三

別家亦云久，昨得家中書。
書中何所云，父母與妻孥。
昔來柳依依，素雪今載塗。
豈不念還歸，天子西擊胡。
登山

眺故鄉存沒兩嗚呼丈夫死國讐安能戀里閭生當取
封侯怨別祇區區

其四

久處行伍間漸知苦樂情能蟠丈八鎗徒御不我輕府
帖昨夜下燒荒有我名秣馬待天曙肅肅寒霜零左韃
挿雕羽雄劍躍且鳴日高渡黃河東過受降城所羨在
滅胡富貴何足榮

屯田

葉落歸故根孤雲有時還凶年間里盡誰門今幸全
者自何歸皮膚半不完百租叢其身欲訴誰見憐吾家
十八軍獨我猶從戰昨當戰交河左髀貫雙箭本不識
犁鋤況復千畝租三訴吏不語鎖頸投囹圄

其二

日落蒼天昏奔馳吏下屯揚言科打使論丁不論門老
軍出聽卯老婦吞聲言邊城寡機杼耕種育兒孫誅求
餘粒盡竭力豢孤豚昨當統管來宰剝充盤飧言旣復

長號吏去收他村

塞上雜詩

邊烽日夜至飛符來會兵
羊牛入高砦雞犬皆震驚
壯士按劍起鞍馬若流星
鎗急萬人靡笑上受降
城生繫五單于歸來獻天庭

其二

胡兒追野馬迸蹄若驚鴻
一馬帶雙箭墮我邊壕中
敢望不敢近躊躇各按弓
抽身復北去天寒沙磧風

功德寺

宣宗昔行幸遊戲玉泉傍立宇表巖窠開池荷芰香波
樓遞颺沓風松奏笙簧百靈具來朝落日錦帆張萬乘
雷霆動千巖滅流光綺繡錯展轉翠旗沓低昂法眷撞
鐘鼓宮女拭御妝笙鏞沸兩序星斗宿巖廊至尊奉太
后國事付三楊六軍各宴眠百官守舊章巡非瑤水遠
跡豈玉臺荒嗚呼百年來回首一慨傷鳳騰赤霄暮龍
歸竟茫茫山風撼網戶紫殿生夜霜退朝值沐休我行

暫翺翔娟娟登岸林慘慘度石梁廢道哀湍寫松柏間
成行啓鑰肅覽歷過位增悲涼積久灑掃缺乳鴿鳴膳
堂舊時琉璃屏倒樹如人長神已佐上帝教猶託空王
鈴磬颯鳴夏晨昏禮相將盤遊非聖理操縱在先皇至
今朝廷上不改舊紀綱

翠華巖

洞劖耶律詞其名翠華巖俯視聳觀閣仰面攢松杉厥
維何王代鬼斧開蘄碧精氣久削薄烟嵐鬱相攬屢憩

驗足薊獨往悲情凡入蘿畏石墜轉嶠驚日銜飄飄萬
里風吹我秋衣衫放迹慕康樂入道懷賀監載思武陵
避愈悵桃花岳去住亦由人極目江上帆

望湖亭

來登望湖亭始盡覽歷妙布席倚岳嵌波望領佳要山
花落天鏡鉤簾巨魚跳岩潭遞隱見圓浪浴奔峭岫律
百萬閣日落展光耀羈縛阻延放臨淵羨孤釣霜寒葭
茨白沙晚鵠鷁叫吾非阮生倫於此亦長嘯

呂公洞

厓根豁一門怪石相撐拄
豁訝自吞呷白晝亦風雨
陰處汎清泉積苔蔭鍾乳
往聞茅山勝夙慕華陽主
路遐限孤往倏歷十寒暑
經亘騁心目小憩偕道侶
茲洞雖人境固足託茅宇
惕然忽內咎我何戀簪組

香山寺

萬山突而止兩崖南北抱
鑿翠置殿榭級石上穹昊
高卑各稱妙曲盡結構巧
有泉如線縷盤轉出松杪
嗜奇

忘登頓緣危肆探討險絕逼牛斗蕭颯若風島夜宿來
青軒天色碧可掃湖沙靜莽莽海月白皓皓想當邦邑
初此地只蒿草綺麗仡誰鑿岩壑爛相裊但看全盛時
民力為茲槁

平坡寺

西山萬佛宇爛若舒錦繡平坡憑風迥突出衆山右宮
閣因岩坳面勢巧相就百里見琉璃巖嶽戴雲構朋遊
探絕迹杪秋歷羣岫得此目力展恍疑出氛囿仰看北

斗逼俯恐東海溜雄壓香山麗閣掩望湖秀落木響岩
牖寒嵐染衣袖延緬古今并佇立悲慨湊盛葉慮反始
危基有傾仆千載誰復臨逆想蓬蒿茂

天寧寺觀塔碑

舊瞻天寧塔今覽天寧寺茲塔多鬼怪光芒夜夜至不
知何時殿結構今頽棄剔蘚讀其碑識是隋文季蝌蚪
半剝落蛟龍猶罌扇我來值時暮攬逝發潛喟修陸控
趙代長山衛燕冀蒼然野眺合一灑楊朱淚

鏡光閣

我生走紛境，性意苦不適。竭來鏡光遊，不覺祇樹夕。鳥
藏丹閣暮，蕭槭柿葉赤。杳如造岩壑，聞其寡人迹。其王
戴金冠，天子之所客。迓我蔭，荀下坐我紅罽席。落日入
虛牖，窈窕雲光白。團團石蓮燈，照耀錦繡壁。忽聞鈴磬
發，轉悵俗務迫。靜躁本殊科，利義各有癖。伊余竟何為，
奔併阻行役。乞君摩尼珠，一照幸不惜。

媯皇墓詩送喬太常

正德元年上以卽位遣官禮百神

伊聞女希氏奮迹鴻荒日神功義農並吹簫豁陰鬱鰲
極本寓言蛇身竟恍惚遺墓趙城側古廟松杉密霍嶺
峙嶺岍汾川眇蕩滴穆穆秉德臣肅肅奉瞻謁祈靈沂
遐躅明裡備精物天雖積清氣運久恐漏闕徒煉五色
石寥廓詎能越送子顧周道俾我心於邑

三忠祠

憶昔漢諸葛龍起答三顧志決竟星隕嘔血為軍務鄂

國與信國屹屹兩玉柱殺身不救國冤憤水東注往事
勒鐘鼎新廟傍官路慘慘冠劍並凜凜生魂聚翠旗晚
明滅往往鬼神駐懷歎各不申翻然向烟霧我征久奔
迫過此感傷屢時來展肅謁繫馬門前樹香臺野藪上
羅幔蟲蟻蛀烈士為吞聲清風激頑懦

艮嶽十六韻

城北三土丘揭嶸對堤口黃蘆莽瑟瑟疾風鳴衰柳云
是宋家嶽豪盛今頽朽我聞帝王富東京實罕有鑿池

通嵌竇移山媚戶牖皮業樓觀合歛吸風雷走岩陰翡
翠吟海窟蛟鼉吼燕趙矜麗人搜剔充妃后君臣互沈
湎斯道詎能久嗚呼花石費銖鎰盡官取北風卷黃屋
此地竟誰守迢迢五國城二龍回其首向使任忠良邦
國得滅否余來值寒暮悲歌坐林藪狐狸竄古壘破瓦
沒藜莠孤城峙我前蒼蒼日將酉

天馬

天馬從西來汗血何歷歷天子顧之笑置在黃金櫪嗚

呼神駿骨草豆日蕭瑟瘦骼突碑兀銜轡掛在壁白日
涕至地青雲志拋擲朝望碣石津夕盼流沙磧猶能肆
橫行倘君賜鞭策

古意

有鳥何方來哀鳴向西北我欲縛此鳥天路險且棘悠
悠浮雲行照我暮顏色丈夫重幾微男兒死邦國長鯨
一奔逃萬網不可得平生反掌志對此空歎息亭亭特
生杜道傍皖其實孤桐雖良材棄擲處遐域而余竟焉

往鳴呼淚沾臆

遣興

金陵固麗地幽薊亦名城
皇天作南邦北斗開瑤京
萬國梯航入宮殿造泰清
大哉帝王居海岳自環縈
禹功肇胼胝湯也勤四征
煌煌肯構訓聖人垂其情

其二

四海為我土九夷盡來王
貢琛至北戶北至玄谷陽
我祖秉天鉞血戰開其疆
當時受命佐一一皆忠良
噴薄

倚日月萬古瞻騰翔乘運雖有時盛業當自強

歲暮

軒坐意悄悄感此歲年暮一氣有肅殺昊天縱霜露衰
容搖萬物日月立復度赤驥初長成自謂中君御揚鞭
過都市萬馬不敢步天寒草蕭瑟側塞在中路良辰不
再至我髮忽已素不見古賢達盡被名所誤沈吟惜蟋
蟀延佇羨鷗鷺終然託遠適餘者豈足顧

苦熱

伏陰固當奮亢陽乃逾緬嘈嘈螻蛄鳴樹杪風不展上
天收雷雨萬物沮沾洗推案忽大叫蓐御何時返赤日
厚地裂揮汗無晨晚古時有虞舜彈琴理驕蹇軒轅制
六律四序無乖舛何當挽二聖吾欲遂仰偃

十五夜

夜陳芳宴會座有離羣友中秋而無月何以慰尊酒賓
主慘不樂周席盡回首向黑明燈入雲景爛虛牖尚覲
光破漏時問陰薄厚吁哉至精物汝亦蒙此垢上天悲

隔遠人生怨分手月既有開塞吾寧息奔走霜露棲蔓
草疾風下高柳勸君聊盡觴居諸亦何有

十六夜

四海蒸為雲三夜皆天風他方縱有月不照長安中長
安十二樓戶牖鑿玲瓏貴家金張徒高宴開帟幪華燭
代明月何必光遂通夕露久已晞懽娛良未終迫塞諒
有殊盛衰寧見同悠揚雲中魄既滿還自窮鬼神惡盈
踰天道懷其公

十七夜

幽意竟不愜待月坐沙際久陰固當豁明月忽墮地桂
枝沒半輪蟾兔職業廢嫦娥飾粉妝愁絕雲樓悶鸞憂
不解舞竟夕掩孤袂崔嵬黃金闕何由訴天帝景破力
不敵光滿雲仍蔽徬徨步林樾為爾一流涕

小至

日為衆陽宗來往成謝代來之生萬物往以告成歲亭
亭羲和駕建此南飛旆雙龍服偃蹇流雲翼其外和風

卷凍霧重陰颯無賴樞知化工幹冥與天意會大君肅
嘉禮君子幸亨邁誰能助新陽為我激靈籟

贈徐子

偃王世蕪沒石麟亦埋翳徐子發東吳英論有餘地龍
遊滄波阻日出浮雲蔽嗚呼獻玉士竟灑荆山涕光掩
明珠棄寵奪西施廢古來共如此不獨君遭際余本澹
蕩人傾蓋託末契酣歌繼旦暮醉酒無陰霽各為征蓬
散吾豈匏瓜繫舊時南陽宅回首成迢遞蹈海有夙期

與子自茲逝

七夕遇秦子詠贈

皎皎河漢月照我西南樓七夕遠賓集置酒城東陬展
席對雙星盈盈隔中流豔豔靚粧女欲濟無方舟神爽
卽易合茫昧竟難求明明君子德寡妣誰為仇豈無采
唐約失身良見尤人生信齟齬世事良悠悠不見古時
人皓首猶公侯葵藿不餓死富貴安可謀願繫場下駒
盡我盤中羞我今為秦聲子也當吳謳酣歌達清曙臨

分贈吳鉤

贈王御史十四韻

夕寒風自起，集雪耀中宇。朗月一何速，早已爛芳醕。
邂逅我蘭友，設尊欸清語。連翩忽竟夜，悲歎為故侶。
瑤華雖莫折，羽觴時復舉。念昔青年日，共矯凌風羽。
啄食九天步，宿必華池渚。中路更險艱，風波各失所。
大明盪妖氛，迴光蔭衰腐。諸賢既連茹，王子豈羈沮。
餘生實自慶，追念良已苦。摭促廣陵散，愴惻山陽旅。
事諧終合并，感

往徒心楚棄置且安寓懽娛弄尊俎

酬伊陽殷明府追憶見寄十四韻

弱齡負奇節志欲凌海岳白馬金陵來遊戲宛與洛出
從七貴飲醉調五侯謔妍華不見售讒巧恩愛奪涼風
卷團扇世路隨飛藿謫居宰山邑頗喜占名郭川嶺鬱
森秀烟雲日噴薄況當素秋霽清霜掃天末龍門旣疎
峻伊水復澄豁啟牖眺飛泉據案望岑嶠獨撫巖中琴
遙枉汴上作懷賢諒在茲感舊但如昨徒然佇王鳧未

果偕緱鶴終期謝紛袂攜手向嵩岳

與殷明府期嵩少諸山不果十四韻

旅寓限奔迫騷屑隘煩務向來嵩少約屈指謂旦暮豈
惟攀時彥兼欲展秋步僕夫戒衣糧車馬亦充數胡然
泥行邁遂此歎乖還戕戕雲中峯阻爾獨何故佇瞻風
嶠突側耳石泉注夜來逍遙夢忽落嵩山樹纍垂松猿
噉澹沲岩姿露存已超彷彿醒若涉顛遽彼美眇何許
茲端愴難屢采蕙忌及晚我疾畏晨露烟蘿四時佳春

服易為具河陽羣葩發振策冀有遇

酬秦子以曩與杭子并舟別詩見示余覽詞悲
離愴然嬰心匪惟人事乖迕信手二十二韻
無論工拙并寄杭子

憶年二十餘走馬向燕甸縉紳不識憂朝野會清宴嗜
酒見天真憤事獨扼腕出追杭秦徒婉婉弄柔翰探討
常夜分得意忘昏旦雪雨亦扣門僕馬頗咨惋歲蕤香
山閣齒萃蓬萊殿登頓窮目力延攬侔壯觀孔翠不易

馴人生本無絆蕭蕭田中蓬隨風各分散杭生比適越
秦子遊瀝澗南北兩文星光芒亘霄漢余衰更乖謬挂
一每漏萬夙遭青門斤差勝黃州竄偃息於沙澤遨遊
傍河岸秦也雖共區累月不一見秦實困勞冗余亦怕
梳盥何況阻疆域杭也江之畔怵怵睽隔積鬱鬱歲年
換無計脫煩促轉坐迫滋蔓再讀並舟篇愈切山陽歎
誦言各欽德悲離古所患

暮春逢林子邂逅殊邦念舊寫懷輒盡本韻

赤驥奮途路神龍厭池沼不登泰山頂豈見衆山小明
公昔際遇志與青雲杳爛承夕扉詔番苦司隸擾君平
實憤切軒然爭臣表朝野凜生氣樹鮮安巢鳥名孤衆
毀集竄薄憂心悄一投海濱郡遂守荒江眇遼遼嶺南
國借爾揭文旄中天行日月戛戛孤鵠矯君雖關內產
迹自閩中聲業從考亭入統為橫渠紹伊余放曠人漁
潛侶荷蓀亡羊以多歧望洋徒浩漭睽離歷十暑邂逅
值春杪日談恨易夕夜坐忽及曉苑花雖寂寂風絮尚


娟娟回首通州別屈指日不少今看兩白髮誰忍置清
醪君行秉大軸吾歌入幽渺林岑有夙愉烟蘿間裊裊
誠無王良顧空山沒驪褭

安南歌送許給事中天錫

芳阡藉文轂垂楊綰鳴珂使君且勿發聽我安南歌安
南古夷隩嶺嶼蔚陂垞炎原吼象兕溟窟脰鼉鼉爰自
秦漢降懽怛尋干戈天皇操化樞環海無驚波永執臣
妾禮稽首心靡他珠犀走北陸翡翠供虞羅王臣乘四

驪駢駢金盤陀朝濟白藤江暮涉富良河白日破蠻霧
銅柱孤嵯峨雕題覩漢儀已舞何嗟嗟皇仁罄所宣紆
征采民哦使君聆我詞慷慨不顧家僕夫仗明鉞絳節
拂林華樓船下烟渚鼓吹達海涯

空同集卷十五



總校官庶吉士臣侍朝

校對官編修臣閔惇大

膳錄舉人臣嚴儀

欽定四庫全書叢要

集部

空同集卷十六

九



詳校官候補通政司經歷臣郭祚熾

欽定四庫全書薈要卷一萬六千九百七

集部

空同集卷十六

明 李夢陽 撰

五言古八

沐浴子

玉盤兩鴛鴦
拍拍弄蘭湯
振衣馨香發
彈冠有輝光
豈念蓬首女
含情怨朝陽

怨歌行

漢主十離宮涼至花盡歇面面牕玲瓏烟紗印秋月天
公顧我笑手弄雙玉玦但笑不肯留去若流雲沒憂來
抱團扇揚顰望丹闕

少年行

白馬白如雪銀鞍耀明月騎出青雲樓揮鞭向金闕自
言事武皇出身為椒房結交樂通侯擅名鬪雞場尚主
復賜第軒蓋一何光被酒過都市殺人如剪蒿左殪南
山虎右斬北溟鰲昨朝兵符至單于寇臨洮奮身出玉

門殺馬轡寶刀橫行萬餘里叱咤威風起奪馬貳師城
長揖見天子調笑大將軍醉罵柱下史生憎漢相如白
首文園裏

長干行

暄如玉山雪皎如瑤臺月郎來騎白馬調妾桃樹下桃
葉何柳柳不謂君行久倚門問來船見郎寄書否

宋中詩

六鷁退而飛乃向宋都過四海一震蕩青天白石墮世

人見此鳥仰面忽大笑誰知影不滅千載落光耀余方
卧空山聞此一長嘯

河上公

昔有河上公結廬蓬蒿下萬乘時一顧旌旗蔽原野手
揮玉如意顏貌何瀟灑曳裾授道經談天妙無窮清光
耀白日四海高其風言旣忽不見竦身躡星虹鳳凰棲
梧桐鸚雀巢寒蓬饑鳶嚇腐鼠笑殺高飛鴻物固有
如此何必較愚蒙

邯鄲才人嫁為廝養卒婦

妾本寒家女誤入叢臺宮粉黛三千人花顏笑春紅君
王重歌舞幼小不曾通一朝意相迕棄擲如秋蓬昔為
高唐雲今為馬牛風夜夢邯鄲道不識邯鄲中金殿秋
月滿歌吹行烟空白日耀千春何時燭微躬

送友人入關

南山鬱幽幽豐水白浩浩烏啼漢城樹塵起咸陽道驄
馬東方來長鳴翻玉蹄春風吹綠草明月滿關西

送李生京試

黃龍玉帝宅紫極繞逶迤爾行霜雪盡恰值春風時天
起桃花浪烟搖御柳絲要知走馬地非是冶遊兒

送友人之京

與君何處別汴州金梁橋下有古時水遙接廣陵潮君
搖錦帆去萬里上雲霄我掇金光草方期白鶴招

其二

鳳凰鳴珠樹紫鴈滄溟外賈鄧登雲臺寧說富春瀨此

情難具陳臨河挽衣帶積雪太行路明滅客行邁

其三

田方澹蕩人侯嬴亦監門老馬尚悲辛肯負信陵言寶
劍贈烈士明珠報王孫縱令滄洲去終戀紫宮恩

春日柬王相國

白露隕瑤草佳人秋思悲葉落今幾時忽復春風吹榮
芊冒殘雪故柯發新蕤為問酒狂客金尊開對誰

避暑

避暑空林酌行歌
采綠薇南來一行鷺
倒映金尊飛淹留
桂樹夕瀟灑
芰荷衣明月宛相待
休賦醉言歸

余園夏集贈鮑氏

曉挈金玉友出挹池風
清脫巾薜蘿下悠然聽流鶯
白雲行杯中紅蕖媚初英
得意時自笑冥哉塵外情

贈鮑演

我愛汝長子遠志日超忽
浮雲似其心秋水清到骨
縱酒見天真探桂遲月窟
攜手眺大野滄波杳出沒

其二

蒲亭杳何許雲海日浩蕩團團桂枝月秋照沙溪上幾
負春草曲空餘采菱唱盈盈吳門水何時理歸榜

把酒

把酒望天地邈然無可親龍蛇洞庭浦雪霰洛陽春霧
林坐鳴琴烟徑無歸人相思東山月夜夜懸西秦

贈張生

怪爾辭江漢長歌入宋梁北風吹凍野歲晏天雨霜老

馬棄不育悶殺田子方拍手笑侯嬴捐世計不彰顧瞻
臺闕地寒莽但蒼蒼

其二

攬衣斷崖口悲風振古臺叫鴈驚逆雲萬里天為開雪
榛覆寒莎松殿扃餘苔昔人邈安在日落寒色來棄置
勿復道且酌黃金杯

別田進士

子望河上雲我望城中月不共眼前酒況乃天外別白

沙亂海曙黃雲下燕雪後期轉超忽吾將泛溟渤

歲暮夜懷寄友

梁客梁甫吟北風號沙林連山激湍波海氣結愁陰雖
持一杯酒而有萬古心越鳥不巢燕代馬不戀越天明
太行雪霜凍洛門月颯颯湘流深冥冥蒼梧隔逝矣徒
離憂芳蘭為誰結

其二

歲窮長年悲越吟遊子思寒風起枯楊夕坐知天霜落

星動海白飛沙吹雲黃蕭蕭孤蓬轉萬里何超緬沈吟
卷道帙惻愴淚如霰入河討沈淪蹈海事游衍傳書寄
麻姑與爾期相見

冬日夷門旅懷

十日五日霧一冬半冬陰行子念歸旋朔風莽悲吟蒼
蒼孟諸原慘慘杼秋林東望清淺流頗劇溟海心川陸
曠超緬浩然烟水深百齡一何邁萬化相推尋徒傳羽
化迹不見鸞吹音清霜颯滿鏡紅顏條頽侵邈彼五湖

子賢哉吾所欽

行歌古澤中

古澤古雲遊帶索被羊裘川寒凍日白海暝孤雲愁
鴟鴞叫禿木鴻鴈遵方洲腸斷悲哉客黃河不斷流

其二

川原望不極愁思滿歸襟雲蔽長安目水流湘浦心
頽陽滅遠樹積雪明寒岑醉起海月照行歌入霧林

結客行席上贈洪生

翩翩紫駟馬燦燦雲花袍結客梁州市傾心贈寶刀意
氣凌朱亥英聲蓋伯高見說烟塵起橫行是爾曹

故人殷進士特使自壽張來兼致懷作僕離羣
遠遁頗有遊陟之志酬美訂約遂有此寄

我生寡諧俗志與山林期謬擬渭川載豈羨荆山悲弱
齡不解事走馬長安郊紫綬雖掛身丹丘阻道遙心隨
萬里雲舒卷何蕭蕭翩翩朱鳳凰飛集梧桐樹冠蓋交
路衢青雲有捷步彈冠無鈍斨結交盡雄才殷君起東

魯我使關西來揖鞭塵埃中朗如玉山開時從二三友
覽古黃金臺四序更代易人生豈常遇相如歸蜀都賈
誼長沙去去去遊梁園耕釣孟諸數日月東西沒黃河
落天走雲沙白皓皓萬里見海口雄劍掛土壁褐衣被
兩肘朝從河上公暮逐墟中叟有時弄清漪明月在我
手壽張三百里北望一何邇未移山陰棹先枉石川鯉
剖鯉得素書故人今何如錦字偕華星照耀蓬蒿廬
空谷激寒雷冬庭轉蘭芳曉起誦瑤音夜夢君之旁書

中何所有相期陟東岳巉巖丈人峯彷彿几前落倏如
佩蒼龍倒景騎玄鶴願從東道主握手翔寥廓

紀夢

夜夢走西陸半天落金城天門兩壁開見之駭心情大
江橫其西落日懸金盆日流江波湧霞彩照乾坤我問
此何方云是湧金門揮手上雲樓邂逅錢世恩把袂凌
天梯笑倒黃金樽袖出石室訣飲我金莖露人區杳難
託東指蓬萊路夢醒不見君空江暝烟霧

大霧翟左二子來訪

蒸烟暝萬古垂雲結樓臺白日墮空冥天地安在哉川
嶽冰穹崇寒林條花開對酒不能飲擁褐心悲哀翟生
崔羅裔左氏麟經才攀嵒涉古陂訪戴臨河隈兩騎踏
蒼茫宛如空中來日夕嚴飈興稍見歸鴉度雖開燕臺
雲不辨焦橋路呼兒劇凍巖然蒿寫秋露談玄析綿邈
覽古悲沿沂停杯劃一笑茫然獨四顧

翟生苦節尚志人也適從余河之上余嘉敬焉

作詩以贈

原子懸鶉衣仲蔚蓬蒿丘蒼烟卧木石浮雲傲王侯常
懷一飯恩不顧千金酬絃歌空桑裏登嘯大岡頭眷念
墟中約慇懃河上遊我亦釣鰲者佳期杳滄洲

晉州留別州守及東鹿令用李白崔秋浦韻

荒原送行客白楊起西風雙鳬下雲漢五馬繫秋桐連
城潯水上馳譽燕代中登高望雲海離思浩無窮

客過屬驟雨過

鳴雷不終夕急電偶來同城波靜綺席苑樹生長風雨
殘白日外虹垂青霧中為愛揚州客留連尊酒空

程生遊華山歸也誇我以絕觀動我以靈篇爰
贈此章抒我夙悵

君行值杪秋飄飄登雲巔笑弄石蓮花俯漱玉女泉秦
時采松女有無嬉紫烟雙騎兩茅龍曾逢呼子先夜棲
何峯室遇師叩何詮一虎嘯海月萬壑驚風旋颯然毛
骨換錯落神光圓晨興板長蘿朗詠青霞篇黃河衣

帶去蓬萊瞪目前赤日跳扶桑仙掌發紅鮮伊予歎茲
游挂心三十年夢想落鴈頂攜詩問青天林麓限層雲
奮飛悵無緣安能振衣去共爾追羣仙

懷湘曲

湘筠寒翠滿白日起秋雲美人杳何處江氣長氤氲手
持紫玉管遙望青霞君藹藹波水暮何由致慇懃

獵雪曲

日光搖白雪黃雲片片裂狐裘誰家郎駿馬如電掣馳

騁復徘徊掉臂角弓開一發中雙狸笑上梁王臺

其二

荒荒凍日白出門雪一尺爰爰道左兔意態一何適我
弦纔一鳴不見彼行迹寄言遊獵人姑待春草碧

泂溪吟

濟川何必舟編竹便可涉秋風蘆白花洄沿水一葉淺
之不用維渡深豈須楫黑潭有龍氣雲起腥風接

送藩幕張君入朝

騶馬向風嘶銀鞍翻玉蹄結裝紫薇下別我綠楊西記
室髮點漆參軍髯過臍馮唐莫恨老神物不終泥

贈程生之南海

生為海南客幾度登羅浮天清衆島出萬水朝宗流乘
桴聖者歎望洋遊子愁明珠與翡翠歲歲到神州

近竹吟

蕭蕭數竿竹每與寒歲期翠色酒中滿清風琴上吹疎
值月來處密當雲起時萬動紛華裏一杯聊自持

水司陶君種桃柳成各有詩予和二首

沿堤萬萬樹一挿卽成林五柳陶公意甘棠召伯心許
我聽鶯去攜壺就綠陰

其二

如何梁苑地忽見武陵津汎汎青霞水盈盈紅錦春
巢熟貧民食無兒許婦人

贈謝子

涼風吹海月當酒墮我懷愛此皎潔光願與君子偕攬

之不入手仰面看昭回銀潢南北流竟夕但徘徊

其二

大河起長風挂席破黃濤問予今何之嶺海聊遊遨羅
浮綠髮人思之我心忉幸君叩丹訣順風託鴻毛

相逢行贈袁永之

清晨客叩門投我一書札開緘錦雲爛鏗然玉相戛問
客何方來新下黃金臺揚鞭指河洛迴旆陵高崖選珍
掇琪草採美收瓊瑰路逢赤松子並舉收氛埃道同心

乃冥神投誼難乖古人重良契豈必聲影偕行行報嘉
績貢此明堂材



空同集卷十六

欽定四庫全書薈要卷一萬六千九百八

集部

空同集卷十七

明 李夢陽 撰

五言古九

田居左生偕二李見過

習宦非我長官久計轉拙遭斥還田廬獲與初念協樹
藝良有期農事固堪悅飄飄緣原風皛皛明川月披襟
恣吾適既夏不知熱回思行役日寒暑靡得輟疎懶古

雖鄙任性亦可說膏疇矧豐蔚積潦復淒冽白日皎在
茲停雲靜如結為謝二三子努力慰衰劣

其二

去官今七暑漸與農務親隨宜諳土性言語羣野人時
或遡微風行歌響空榛先民邈何攀慨焉傷我辰慨傷
適誰知所有二三賓文論日往來炯炯高義伸炎雨回
衆姿涼飈起修畛兀然林木下日入忘歸輪玄蟬夕益
聒去鳥一何頻野行畏多露無使侵夜巾

城南別業夏集

田居不自娛，況兼林水情。
聿茲暑衣晨，而與佳士并。
挈榼溯芊緜，臨墮弄澄清。
娟娟浴沙鷺，交交鳴枝鶯。
雖非巖潭區，閒曠足我營。
菰蒲裊寒陰，隕果時自驚。
有室矧伊邇，遐哉謝塵縈。

其二

荷鋤倚高詠，濯纓肆佳吟。
疇知稼穡場，乃爾蒹葭侵。
步風逾曾堤，徙筵趨重陰。
於情既有託，矚寓良自深。
逶迤

波上雲征厲草間禽隋臺信已古魏城方肇今驗物果
足遣孟乾聊復斟

慶都篇

於昭開帝則蕩蕩協欽文高辛初纘服大舜復升聞瞻
依太古日悵望春空雲緩策遵墟里翱翔詠放勲

帝乙

此以下三首皆為武宗大婚而作

帝乙歸元歲為汭降高秋白霧凌蒼壁文烟結綵樓楓

陌三公引雲衢六馬遊行當瞻月馭佇想詠河洲

黃衢

黃衢會日月紫氣懸陰陽冉冉神龍下英英朱鳳翔
蘭烟凝玉閣桂月滿金堂禮先歆九廟德已合無疆

其二

桂宮新降馭蠶室爛生氣曳綈成漢業采葛相周文
會奉重輪日先瞻五色雲秋明天路夕瑞雨碧氤氲

十二月朔

積陰凌紫極玄霧暗三辰黃龍遊帝時萬乘若浮雲六
蚪何蚘蟻雜沓走天神明王熙庶載至敬達郊裡玉輦
親牛豕重瞳注鹿羣精誠先百物咸德屆犧人揚鑒回
御道九宇冀陽春

夏歌

積潦溢廣澤炎雲翳崇臺玉階履綦絕紫殿生莓苔螢
流疎竹靜風動綵幃開佳期悵千里竟夕以徘徊

湘妃怨

采蘭湘北沚，寒木澧南潯。
淥水含瑤彩，微風託玉音。
雲起蒼梧夕，日落洞庭陰。
不知篁竹苦，惟見淚斑深。

春曲

萋萋百尺臺，南臨大道開。
月明珠箔捲，塵暗寶車來。
豪雄五都俠，意氣萬人推。
帶醉穿林徑，垂鞭拂閣梅。

結客少年場行

燈如列宿行，月似九秋霜。
番番七貴兒，燦燦五侯郎。
雜沓凌香陌，徘徊競夕光。
各攜黃金劍，結客少年場。

俠客行

幽并豪俠地燕趙稱悲歌千金市駿馬萬里向交河公
卿贈寶劍君王賜玉戈捐軀赴國難常令海不波

從軍行

棄家從上將報主掃胡戎弩滿常隨月旗翻數起風右
指昆邪盡左盼月支空馳名紫塞外開府玉關東不逢
百戰日誰識萬夫雄

出塞曲

單于寇邊城漢將列長營旌旗蔽山谷鉦鼓晝夜鳴乘
我浮雲騎殺我明月弓奇兵左右出長驅向雲中彭彭
陣結虎颯颯劍浮虹一戰臯蘭滅再戰沙漠空歸來獻
天子長揖不言功

銅雀伎

帷飄雀臺上絃奏舞衣前羣悲一以望春草為誰妍芳
歲銷蘭怨流塵集錦筵為問西陵道孰與漢家阡

漳津夕眺

揚舲亂北渚靡蓋望西陵
帳殿牛羊下歌臺麋鹿升
日夕松柏路蕭蕭響風樹
連沙改故浦空山沒蒼戍
徘徊望霸氣鄴城在何處

呂仙祠

孤遊逢呂跡永逝感盧生
眷彼炊梁術契我遺世情
蒼山故國道落日邯鄲城
陰陰祠宇夕宛宛曲池清
不見金芝侶誰聞朱鳳聲
田鱣穴桂壁野葛蔓松楹
寧知往來者不是寐中行

三日河上宴集

觸霽邁芳垌修祓臨長洎雖非曲觴飲聊異秉簡戲波
延拾翠舸岸匝尋青騎羽爵戀馳景鸞簫劇春思羣謠
狎鳬鴈撫適懽同志亦以擴凡超流連豈吾事

詠樂溪

濯足荒溪口延望大江潯石樹環碧綵泉潭生翠陰經
亘涉清漣沿洄登素岑日暮樵響絕但聞山水音鴻鴈
遵渚飛麋鹿聚空林而子豈不樂其如兼善心

乙丑除夕追往寫憤五百字

憶昔黠賓初皇疾輟臨仗維日白氣亘黑風復排踢俄
傳天柱折忽若慈母喪帝本堯舜姿末履轉清伉斂衽
接耆碩高出文景上兩宮悅孝子九廟歆流鬯毅然整
六師霹靂無前向犬羊遁朔漠鯨鯢蟄溟漲困冲不凝
壽日表空殊相蜿蜿湖中龍一夕拔驚浪回首哭蒼梧
魂兮湘南瘴念昨下明綸臣也誠無狀誓死叫閭闔伸
頸甘碓盜梁竇勢如灼漢廷色惆悵皇乃西園游召彼

侍供張從容杯酒間似讓還非讓未剖青瑣封已下金
雞放臣某詎足惜統體關衰王厯數古明辟聖節疇能
尚誓欲碎臣骨顙帝不得廷攀髯眇莫及痛哭橋山葬
玉光動前星朱符闡靈貺主器難久虛勉起答羣望金
木歟為崇太白晝相抗羯胡敢余侮吾徒盡乘障嗚呼
榆臺役棄我六千壯踉蹌戰士骨躑躑將軍輶二豎固
輕率腐屍亦云當所恨國威辱北鄙氣悽愴鉦鼓疑皇
情何以慰宸況悽悽建未月臨門遣征將紈袴作元戎

京軍本浮宕翻使沿邊卒束手遭箠掠揭礮雲中城誰
復扼其吭胡來風雨聲胡去橫拍唱千村與萬落人烟
莽蕩蕩嬰兒貫高槩志婦經衣桁狐狸叫破壘落日悄
湊沆此輩誠鼠竊反覆亦難量騏驎駕鹽車虛名縛骭
髀世豈乏頗牧賤或執鞭杖瑣瑣登壇子飽之則飛颺
吁此良太枉國慨何由暢水旱而秋雷陰陽迭驕亢皇
天雖至公視之但塊塊臣當歷服始謬進大夫行退朝
實憤切欲吐畏官謗武王秉黃鉞師事太公望列聖構

梁棟駕馭亦英匠先帝升遐日臨榻召三相

贈劉主事麟

駕舟越洪川飄風揚其波白日不可駐浮雲一何多
蹇芳涉北沚采蟲陟南阿悵我平生友傷此欲如何

其二

濛濛孤舟夕橫笛坐烟浦秋綠被汀沙落鴈不可數
烈調千行雲激商復流羽曲竟和者誰佳人淚如雨

湘江吟

對酒歌綠猗歲宴懷佳人山寒翠袖薄微霰沾衣巾空
持紫鸞簫欲致愁無因日暮湘江曲浩蕩烟波春

春曲

維南有曾城下瞰梁王臺雄構翳雲日歌鐘暮徘徊芳
草徧舊畿山川邈悠哉

其二

春城花烟滿杳靄生夕陰白馬繫芳樹繡袂彈鳴琴携
蒲少年子一擲千黃金

其三

綺閣俯通闌後有百尺樓並坐紫羅茵雙引青玉甌楊
花起薄暮粼粼縈芳洲

其四

菁菁艷陽月鬱鬱美人思游絲罥白日炯若春風姿零
落垂手舞空傳白紵詞

其五

借問美人居云住城東隅背有桃李館前臨車馬衢十

三妙歌舞十五冠名姝

朔日

朔日悲風起空除落葉平猶聞砧杵急已復剪刀鳴一
夜傳霜箭黃雲滿塞城

槿樹

槿樹依空砌寒時尚著花未能堪暮色徒自絢朝霞寄
語閨中女無多鏡裏華

槿園

槿園秋氣夕唧唧寒蛩聚風回啼欲斷月落歸何處爰
悲在堂吟復詠山樞句感爾中夜興微霜下庭樹

春情

俗縈一何繇駕言春已分綠郊鮮行輪朱樹花將紛鳴
鴈起前墟浮陽藹東瀆徙倚孤臺側佇迴送征雲

遊寺

褊心儔輩寡幽境莓苔步繇鬱倚磴歇馮孤眺迴屢洞
塔陰古宇芬蘿裊澄樹佇觀野禽哺此外豈吾慮

昇天行

市居苦煩溽陸處懷清波
緬思溪壑側丹崖卷曾阿
仙人桂樹下窈窕攀青蘿
我獨塵歎內營營欲如何

春遊篇

古臺悲帝子歌吹餘春愁
草綠夷梁野雲浮河海流
擊壺詠四澤鼓鐘眺三洲
板條已無那駕言誰倦游

四清篇

盤松屹當戶修筠靜依檻
羈遠桐絲澀蕭瑟鶴思減
歸

傷園塢廢坐令荒穢斬彈曲憩疎陰臯唳清露湛

正德四年七夕上方寺作

逸人厭囂俗達士樂閒勝乃茲城中林而非車馬徑積
雨豁新霽雲石掩秋映微陽下孤塔潦水夾明鏡已疑
塵寰隔況覩蓮宇淨豈惟慕真覺亦以叩詮證玄蟬共
西夕浮雲本無定

戊寅早春上方寺

逾年罔涉茲過之門巷疑匪畏霜露辰肯與春事期徑

蘭芊故叢苑松發新蕤陟丘念廢居升危眺回漪抱以
幽曠豁情緣悽愴移驚風遞虛塔振振空廊悲得遣復
安較勞生良爾嗤

辛巳春夕集上方寺

晨飈奮以厲夕林回晏溫郊遊悵伊阻駕言乃松門春
湖靜瑤宇塔蘿裊清樽遙睇被原草近蹇臨水蓀花雨
時自落法雲凝復奔淹留遲寶月破此人徑昏

山中

山中雨乍歇一夜瑤草長風吹翠巖竹下應石瀨響時
來展書坐悠悠絕塵想

置薪

讀書古木陰置薪倚其根露零石徑滑雲起溪日昏白
虎啓魏觀金馬開高門君自薄簪紱難稱國未恩

九潭詩

岩岩千仞嶺下有百尺潭夕風起微瀾漉漉動晴嵐俯
之鑒我心佇翫雲波涵流蕤颺寒清躍魚手可採溪暝

樵響歇猿鳥來相參寄語泥中物長蟠恐未堪

空同集卷十七

欽定四庫全書薈要卷一萬六千九百九

集部

空同集卷十八

明 李夢陽 撰

七言古一

漢京篇

漢京臨帝極複道衆星羅烟花開甸服錦繡列山河山
河自古稱佳麗城中半是王侯第峻閣重樓夾道懸雲
房霧殿森虧蔽牧豚賣珠登要津樊侯亦是鼓刀人時

來叱咤生風雨。奄見吹噓走鬼神。平津結兄蓋。侯弟杯酒相看何意氣。執鞭盡是虎賁郎。守門不說長安尉。長安烽火入邊城。挺劍辭君萬里行。去日千官遮馬餞。歸來天子降階迎。朱弓尚抱流沙月。寶鉞常飛瀚海星。不分燕然先勒石。直教麟閣後標名。豈知盛滿多仇忌。可惜榮華如夢寐。地宅田園奪與人。丹書鐵券成何事。霍氏門牆狐夜號。魏其池館長蓬蒿。三千劍客今誰在。十
二珠樓空復高。後車不戒前車覆。又破黃金買金谷。洛

陽亭榭與山齊北邙車馬如雲逐陰郭豪華真可憐雲
臺將相珥貂連當時却怪桐江叟獨著羊裘伴帝眠

明星篇

正德間早起聞內教場砲喊之聲作此篇也

明星出地一丈高天門沈沈魚鑰動沙堤露下玉珂寒
直廬鷄唱金蓮重千門萬戶曉鐘發明星漸高河漸沒
燦爛疑侵翔鳳樓依稀故抱飛龍闕鳳樓龍闕帶曾城
翠輦朱衣夜夜行黃昏競奏催花宴天明猶聽打球聲

蘭烟桂火燁如日明星迢迢照不入百子池頭青草生
長信宮中紫苔集草色苔香秋復春此日乘槎若問津
明星曉落宵還見白髮黃金愁殺人

楊花篇

洛陽三月東風起楊花飛入千門裏只見朝紫上苑烟
那知夕逐東流水苑烟流水無休歇暖日輕盈度仙闕
趙女瑤臺貯綵霞班娘團扇啼明月綵霞明月幾沈輝
陌上行人亂撲衣征夫柳塞愁看鴈少婦深閨懶上機

柳塞香閨萬餘里草色連天度隴水玉門關外雪猶飛
章臺樹裏風先起誰家浪子千金馬平明挾彈章臺下
頭上羅巾玳瑁簪腰間寶鉞珊瑚把踏絮來尋賣酒家
持香坐調當壚者當壚美女怨陽春笑掇楊花襯繡裯
青樓薄暮難消遣白雪漫天愁殺人冥冥漠漠春無極
此時惟有楊花色一朝風雨薜蘿爛獨慘垂條三歎息

去婦詞

正德元年戶部尚書韓文暨內閣師保等咸相繼

去位李子作此詞也

孔雀南飛鴈北翔含顰攬涕下君堂繡幙空留並菡萏
羅袪尚帶雙鴛鴦菡萏鴛鴦誰不羨人生一別何由見
只解黃金頃刻成那知碧海須臾變賤妾甘為覆地水
郎君忍作離弦箭憶昔嫁來花滿天賤妾郎君俱少年
瑤臺築就猶嫌惡金屋粧成不論錢重樓複道天中起
結綺臨春照春水宛轉流蘇夜月前夢迷寶瑟烟花裏
夜月烟花不相待安得朱顏常不改若使相逢無別離

肯放馳波到東海薄命難教娣姒知衰年恨少姑嫜在
長安大道接燕川鄰里攜壺舊路邊妾悲妾怨憑誰省
君舞君歌空自憐郎君豈是會稽守賤妾寧同會稽婦
郎乎幸愛千金軀但願新人故不如

蕩子從軍行

蕩子從軍行者本駱氏蕩子從軍賦也余病其聲
調不類於是改焉

胡兵十萬起妖氛漢騎三千掃陣雲隱隱地中鳴戰鼓

迢迢天上出將軍邊沙遠離風塵氣塞草常萎霜露文
蕩子辛苦十年行回首關山萬里情才聞突陷賢王陣
又遣分圍右校營紛紛鐵騎朝常警寂寂銅焦夜不鳴
滄波積凍連蒲海雨雪凝寒遍柳城地分玄微指青波
關塞寒雲本自多嚴風凜凜將軍樹苦霧蒼蒼太史河
揚麾拔劍先挑戰征旆凌沙犯霜霰樓船一舉爭沸騰
烽火四連相隱見戈文耿耿懸落星馬足駸駸擁飛電
終當取俊效先鳴豈暇論功稱後殿征夫行樂踐榆溪

倡婦銜怨坐空閨
靡蕪舊曲終難贈
芍藥新詩豈易題
池前怯對鴛鴦伴
庭際羞看桃李蹊
蕩子別來年月久
賤妾深閨更難守
鳳凰樓上罷吹簫
鸚鵡杯中臨勸酒
同道書來一鴈飛
此時緘怨下鳴機
已剪鴛鴦帖
夜被更薰蘭麝染
春衣
屏風宛轉蓮花帳
牕月玲瓏翡翠幃
箇日新粧如復罷
祇應含笑待郎歸

洛陽道

桃花馬金絡頭
白面郎紫貂裘
三月洛陽道
垂柳陰清

溝溝水東流不記春花開
花落幾迴新東風日暮楊花
起愁殺高樓獨倚人

野田黃雀行

鶉奔奔鵲僵僵來逢野田雀
相逐過南疆北地苦霜雪
南地多稻粱人生美食被綺衣
不及鴻鴈能高飛鴻鴈
下天遭網羅不食奈爾黃雀何

苦寒行

太行之山何崔嵬天寒谿谷禽獸饑
黃熊赤羆力相食

翠衿繡翼徒南飛啄食飲泉百意足野田稚子寒無衣
張羅掛畢伺鳥雀口作雌雄鳴且悲鵲鴉小鳥鼓翅落
鼎食之家意不樂頓箸待爾登品錯奏應鐘開玄堂羶
幃錦幄冬夜長微禽效體樽俎光禿鶯駕鶴當簷翔

結交行

昔時韓生有艷妻其君使築青陵臺南山有鳥不肯來
烏鵲雖小禽不受鸞鳳猜以此築臺成二人葬寒灰舉
國見之悲且哀悲且哀斷人腸墳上連理樹變為兩鴛

鴛鴦唼交頸綺翼張春風蝴蝶花飄揚君不見酈呂結
交日朝為刎頸暮拋擲如此結交復何益

梁園歌

朝發金臺門夕度博浪關黃河如絲天上來千里不見
淮南山淮南桂樹弄婆娑掛席欲進阻洪波我今亦作
梁園歌梁園昔有信陵君名與岱華爭嵯峨三千珠履
不動色屠門執轡來相過功成不顯涕滂沱青蠅白壁
一何多我為梁園客不登梁王臺錦帆揚州門一去何

時迴荒烟白草古城沒登臺望之令心哀令心哀歌且謠
迷塗富貴苦不足寧思白骨生蓬蒿人生三十無少年
積金累玉空煎熬獨立天地間長嘯視今古城隅落落
一堆土千年誰繼白與甫攬淚浮雲灑烟莽灑烟莽風
吹卷波濤沈吟投箸不暇食蹴天濁浪何滔滔君不見
昔人然諾一相許黃金斗印如秋毫

梁園雪歌

昔對燕山雪岩嶺白玉京曉曳王恭氅飄飄入紫清今

為梁園客獨對梁園雪黃雲索寞連滄海九疑望盡飛
鴻絕

其二

飄風動三極霏雪灑烟海天地倏低昂虛無變光彩梁
臺空嶠屺枚馬今安在飛光超忽若游龍我欲從之問
千載

世不講曹李詩尚矣內弟會余河上能章章道
也驚有此贈

曹植白馬篇李白飛龍引流光耀千古不與日星隕世
人捧心戚番為西子哂左生三十歲雅志測沈冥鯨飲
傾百川自稱吾酒星今朝理酒船來過子雲亭高談叫
太白八斗揮雷霆霜雪連山海氣惡柳枝簌簌冰花落
此時萬里無人烟誰信清吟動池閣動池閣生暮愁雪
澤古龍寒啾啾他時爾獻三都賦我釣長江萬里流

酬錢水部錫山之招

無錫錢少陽招我棲錫山江上千萬峯裊裊凌江闌下

有震澤湖旁有太伯灣昔時蘇公慕陽羨陽山錫山對
相見我獨何為阻茲游西風吹心落吳甸我問錢少陽
汝今在何所振轡金馬門看花曲江許徐庶竟辭劉張
翰憶吳州鷺湖雲嶼間鴻山林樹秋我今放浪黃河隅
遙憶白粲心鬱紆幾時彈劍賦歸來與爾共醉芙蓉湖

寄錢水部

我今在何所牧釣睢川陽子今在何所飛蓋臨東方高
山大澤不我限胡為日夜遙相望鴻鴈日南飛不寄一

封書離別春草生相思秋葉疎朝看渤海雲暮眺滄洲
月樹寒多天風相思幾時歇

十四夜脩然臺

正德初李子潛河上築脩然之臺

中州可以望天地黃河之水何恍惚為此築臺臨其涯
坐看月生復月沒今年中秋地無雲綠烟溟濛海月發
金流水波貝宮湧蛟龍出遊爭海月我欲乘槎捉蛟龍
浪高力微懼滅沒嗚呼滅沒不足惜只恐竟無益

其二

蓬池有嘯臺夷門有吹臺二臺突兀眼前一抔土英雄
落莫成今古我今有臺不嘯復不歌月高霜白如夜何
臨洪河望四海山川悲月不改昔日芒碭五色氣烟銷
浪滅今安在

十五夜

去年燕山南易水北終宵待月不可得霧雲崢嶸蔽瑤
闕頓箸停杯三太息今年有月復有臺海門烟滅沒四

顧天地開何爲不飲歌且哀君不見少年時馳逐京洛
陌夜夜謹呼山月白揮鞭不顧五陵客月圓月缺天有
之人生豈復如舊時不如采取靈兔藥富貴浮雲豈足
樂

十六夜

唧唧復唧唧當戶鳴促織月中何所有云是仙桂枝此
桂開花復結子安得夜夜常不虧君不見梁園酒一斗
錢十千昔時信陵有賓客不飲豈足稱豪賢直須酩酊

卧草澤明日射獵睢陽川

十七夜

三日不見月見之半輪
沒清光猶能鑒毛髮不愁倒卻
婆娑樹只恐損破清虛闕
清虛闕在何許白氣熒熒走
金虎雖有三萬六千戶
手提玉斤不敢補涼風飈飈自
西來吹我衣心獨苦
長歌潛行攬洲莽

客有笑余霜髮者走筆戲之

客且盡手中觴不須笑我頭上霜
客盡觴且停之聽我

高歌霜髮詞君不見天上烏東跳西走不相待又不見
黃河水萬古滔滔向東海我身不是南山松又不是
山上峯奈何與少年爭春風鬪鷄走狗傾春紅君不見
昔時孔仲尼轍環顛顚無已時盜跖殺人如亂麻錦衣
高壽顏回嗟聽我霜髮歌歌短情則多軒車駟馬渾等
閑何似日銜金叵羅金叵羅青玉案何以贈客錦繡段
頭白頭白何須歎

戲作放歌寄別吳子

吳名廷舉字
獻臣蒼梧人

惟昔少年時彈劔輕遠遊出門覽四海狂顧無九州獻
策天子賜顏色錫宴出入黃金樓揚鞭過市萬馬辟半
醉唾罵文成侯結交盡是扶風豪片言便脫千金裘彎
弓西射白龍堆歸來洗刀青海頭崑崙河磧不入眼拂
袂乃作東南遊江海洶湧浸日月島嶼颺沓混吳越匡
廬小瑣拳可碎鄱陽觸怒踢欲裂澤中龍怪能人言噴
濤吹浪昏漲天大鵬舉翼四海窄笑爾弋人何慕焉東
湖子君非渙忍閭穆取位之丈夫余亦豈卑卑與世而

浮沈恂復共鬪非庸劣廉藺終投萬古欽攀鱗掃氛代
不乏我豈復戀頭上簪鹿門黃犢穩足駕商巖紫芝山
固深有飛倘附秋空音

冰車行

黃門飛鞚西北趨白馬如龍血如珠萬人齊呼冰窖開
大車小車如山來但見風行九市陌寧知玉積五侯宅
道傍喝士僵闌干脣乾口燥真大難侯門宴罷夜烏起
朱殘粉落明星裏君不見積冰化作堂前水

鹽井行

山頭井乾生棘蒿山下井塌不可熬官司白牌促上庾
富家典牛貧典女誰其使之華陽賈華陽賈子多少年
擁金調妓高樓邊夜馳白馬迎場吏曉貫青絲還酒錢
君不見場吏乘酣氣如虎鹽丁一語遭箠楚

清夜引

桂魄團團霜兔泣玉龍夜吟冰喉澀仙人起踏白芙蕖
手撚一枝珊瑚株伏猊香噴紅氍毹蠟鳳啼春蝦捲鬚

九華丹焰奪行月五虬轆雲聲軋軋銀箏翠管聲咿啞
繁謳雜舞懽意匝盤中紫棗大於瓜誰其擎之萼綠華
雙桂逶迤頭兩丫密情芳緒芳且嘉瓊城夜半重重閉
偷桃小兒安得至

沈大夫行

沈大夫遺我以凜冽玉壺之冰報汝以離離朱瑟之繩
繩以發淩雲絕響之妙曲冰以滌卓犖硤礪之清膺此
曲可以掘地懿揚天經宣融風召遐齡奏之敬姜室允

宜軻母庭沈大夫奉詔且還家松江鱸魚白躍玉土居
斫笋如斫麻烹羊擊鼓會親戚太守長吏爭趨車倚乎
嘉哉男兒生不顯親譬如錦衣夜行雖貴何足誇

雪山歌送萬子

雪山高哉崕乎岌兮吾不知幾千萬仞但見雲峰之崔
巍巖冰陵兢縞壑熒石晶矐而萃律兮懸猱不得度飛鳥
何由迴大峯如老翁冕珮凌紫埃諸峯似兒孫羅列笑
蓉開江日洶湧地軸動孤光倒曳生奔雷岌乎崕哉雪

山之高不可以攀陟斧斤不入松柏如麻霜幹翳蔽雲
根槎枒滲膏結苓實輪囷走龜蛇君今策駟過其下車
徒滾滾如飛沙何不劓取松下苓獻之堂上翁上以介
壽考下以召禎祥噫吁戲雪山之高吾不可得而名惟
有峨眉玉壘萬古遙相望

廣州歌送羅參議

麗哉遐乎廣之為州兮闢炎區與雄跨乎南陸天作五
嶺奠玄武排空下走何崔嵬拓邦幾千祀浩蕩人文開

秦還漢往不復識但見古城蒼蒼生綠菜上則盤岡曲
丘龍蜿蜒虎蹲其下膏場繡澮曖而渟洄水銀丹砂布
平地珍錯奚翅犀與瑰夷舲賈舶競追逐白首浩淼誰
曾回土產之異尚如此何況四民者挺然參三才君今
綰牒向南去清風吹袂心悠哉崢嶸五羊城側有千尺
臺曩昔聞君坐其上醉睨滄溟如一杯是時榕蹊雨初
霽茉莉霜成堆君嘗夢遊而神適兮豈知七載還復來
男兒成名貴及早英雄多少埋塵埃羨君青鬢結明主

出參方岳聲如雷金章紫綬不可以倖致如君者謂非歷
塊之龍媒羅浮三千六百丈岷嶺倚窮隈巨鰲戴之與
波下上三十五蓮峯照耀雲中輝羣仙跨飛龍流影亂
巖霏我欲從之歎無術送君翹首空徘徊

空同集卷十八

欽定四庫全書薈要卷一萬六千九百十

集部

空同集卷十九

明 李夢陽 撰

七言古二

桂巖行

白龍不識漁溪惡化為魚服遭人縛黃髮先生困泥阻
白馬小兒氣揮霍道傍朽木藏蛟龍霹靂猶聞夜火紅
寄謝少年諸數公貧賤豈必皆愚蒙桂巖紫芝春盡發

騎驢且覓商山翁

崖松行

峭石從巖木相樛孤松挂日崖光幽朔風北來霜雪暗
山深草黃途路修此時亭亭見松意排空柯榦流雲氣
大廈傾時梁棟急君看此物終難棄

丹穴行悼丘隱君

丘名琥號松山夷門隱人也

北風颯颯吹丹穴幽篁梧樹寒蕭屑孤鳳威垂眼流血

蘭陽丘公昨謝世使我杯乾已數月出門騎馬向誰適
世事悠悠忍能說薄俗踰趨始為敬老夫平生性懶拙
後生譏訕轉多口白壁青蠅從點缺宋門汪隆頗好事
見我握手肝肺熱近亦客死臨清州北望傷心路途絕
可憐親友日零散老成耆舊灰燼滅不爭汝曹灰燼滅
又值天寒地欲裂

苦寒行

前日雪落傷麥根北風刮地天色昏沙飛石走拔大樹

雪積林坳出無路城中死者不知數我歸三年河不凍
今年冰堅車可渡觸面慄慄厚地裂四顧乾坤莽明滅
尺薪粒米貴如玉君不見日晚空牆貧士哭

夜行歌

月輪未安光已皎我行夜出夷梁道力疲足酸堤上坐
黃狐怒立啼向我宋家宮殿盡瓦礫陂湖燒鹽焰婀娜
忽憶東京全盛時月行對此誰能那

古白楊行

百泉東岸三古楊下枝掃拂書院牆上枝瑟瑟干穹蒼
空山野陰雷雨黑柯榦冥冥動山壁剪伐難為棟梁用
盤踞番逃斧斤厄但見白日悲風發寧知六月撐霜雪
烟色慘愴精靈聚孤根倔强源泉裂憶昨訪古憩其下
居人不敢留車馬落籜尚禁牛羊食汙穢頗遭縣官打
丞相古柏霹靂碎將軍大樹空蕭灑岡頭石路莎草長
孫邵李許同一堂春風漂泊予到此不見古人惟古楊
古楊蕭蕭暮流急波翻浪倒蛟龍泣衛女幽憂拾錦花

逋臣寂寞愁難立君不見太行羊腸莫比數上有毒蛇
下猛虎樵斤獵火不虛日桂柏椅桐氣悽苦嗚呼楊兮
楊兮爾何盤根據茲土

泉上雜歌

游子樂游復長歎臨深坐歌白石爛石泉漠漠常東流
我今胡為坐泉頭渚花冥冥野陰薄谿日杲杲蒼雲愁
君不見古來爭戰地山寒雪暮風颼颼

其二

美人被服貂襜褕春日遊行春水曲綠蘿無烟山雲暝
扣石長歌歎幽獨撥刺紅鱗錦湍游我欲釣之且復休
金盤玉箸在何許為爾臨淵淚如雨

自從行

自從天傾西北頭天下之水皆東流若言世事無顛倒
竊鉤者誅竊國侯君不見奸雄惡少椎肥牛董生著書
番見收鴻鵠不如黃雀啁盜跖之徒笑孔丘我今何言
君且休

大梁城西門行

水門堤口雙柏樹種之何年不記數風飡雨蝕生氣微
枝葉半凋委官路烏鴉螻蛄復啄食我行見之淚如注
古來根本忌先撥嗚呼奈此棟梁具及今可為當語誰
半夜吞聲向北去

羈旅翁行

自焚闕里手植檜天下斯文忽墜地錦衣使者日旁午
青衿胄子時流涕霾風翩翩起白旂五月黃塵暗天際

君不見河上羈旅翁時乖此老遭拘紲

寶刀篇

我有吳王雙寶刀龍鱗雪花爛照地奉君清宴可君意
佩之十年不曾離黃金鞶帶白玉鉤出入魍魎魑魅愁
功高見疑反遭怒此物拋擲今兩秋丈夫生世輒軻亦
如此終日戚戚何為爾

秋夜歎

君不見梁上蝠飛走掠蠅蟲蠅蟲四散不受掠而我胡

在縲紲中豈卽運命委霜雪要知腐草生華風沈吟徹
夜不能寐此時天風雨將至但聞蟲聲啾啾復唧唧鴻
鴈嗷嗷忘南北

其二

臭蟲多足蚊有翅當我眠時忽而至憤悶披衣坐歎息
竟夜搔爬無氣力寒霖蕭蕭響荆棘君不見吹燈無烟
四壁暗野狐跳梁鬼啾唧

思歸引

疾風吹寒破南極凍雨濺濺山樹黑天昏歲暮百憂併
中夜悲歌淚沾臆起視衆星白爛爛我今胡為在長安
思歸路阻多苦寒嗷嗷何處失羣鴈翅濕高飛嗟汝難
歸來行

天下儒冠豈盡誤迂謬棄捐仍道路九月江山凍烟霧
百年裘馬衝霜露窮達自知休怨天歸來且種東陵田
齒過四九已不小釣魚獵兔亦得飽

弘治甲子屆我初度追念往事死生骨肉愴然

動懷擬杜七歌用抒憤抱云耳

吁嗟我生三十三我今十年父不見濁涇日寒關塞黑
杳杳松楸隔秦甸梁王賓客昔全盛我父優游誰不羨
當時攜我登朱門舞牆歌媵爭看面二十年前一回首
往事凋零淚如霰嗚呼一歌兮歌一發北風為我號冬
月

其二

母之生我日初赫缺突無烟榻無席是時家難金鐵鳴

倉皇抱子走且匿艾當灼臍無處乞鄰里相弔失顏色
男兒有親生不封萬鍾於我乎何益高天蒼蒼白日凍
今辰何辰夕何夕嗚呼二歌兮歌思長吾親儼在孤兒
傍

其三

有弟有弟青雲姿以兄為友兼為師十五徧探古人籍
十九不作今人詩從兄翱翔潞河側寧料為殤返鄉域
孤墳寂寞崔橋西渺渺遊魂泣寒食嗚呼三歌兮歌轉

烈汝雖抱女祀終絕

其四

有姊有姊天一方風蓬搖轉思故鄉歲收秣秉不盈百
男號女啼常在旁黃鳥飛來啄屋角碩鼠唧唧宵近牀
洪河鬪蛟波浪怒我欲濟之難為梁嗚呼四歌兮歌四
闋我本與爾同肉血

其五

古城十家九家空有姊有姊城之中峭壑直下五千尺

雞鳴汲回山日紅
犁鋤縱健把豈得病姑垂白雙耳聾
小孤癡蠢大孤情
霜閨夜夜悲迴風嗚呼五歌兮歌五
轉寒崖吹律何時變

其六

冰河蜿蜒雪為岸
忽得鯉魚長尺半
剖之中有元方書
許我是月來相看
臘寒歲窮多烈風
日暮高樓眼空斷
梁都北來道如砥
熟馬輶輪為誰絆
嗚呼六歌兮歌未
極原鵠為我無顏色

其七

丈夫生不得志居人下
低頭覲面何為者
薄祿不救諸親饑
壯志羞稱萬間厦
東華軟塵十丈紅
入擁簿書出鞍馬
王門好筭不好瑟
何如歸樵孟諸野
嗚呼七歌兮歌思停
極目南山空翠屏

解酋行

都昌縣南乾沙上
射鴈者誰三五羣
氊帽紅裘黃戰裙
云是解酋官達軍
沙下北風吹艦旗
邊軍歡喜家軍悲

朝廷日夜望俘至雪凍酋船猶住茲縣官逃走驛官啼
要錢勒酒仍要雞姚源遺孽尚反覆爾曹不得誇遼西
飛蟻歎

李子官江西時睹事感心作飛蟻歎暨西來行也
今朝天光烏鳴喚草萋柳長江渙渙怪爾飛蟻何爛漫
填門撲牕坐我案夜來不虞風驟至屋瓦吹飛船打岸
孤城晦冥霏霏雨前叫鵲鷁後鵲鷁共言此崇飛蟻為
我欲擊之還復歎明明上天非無宰蟻也瑣細何須算

災祥感召固其理先時苟備終無患君不聞漢家滿堂
客不貴徙薪貴焦爛

西來行

冬廿六日十二月西來泛湖雨明滅雨寒著樹盡成雪
天波靄靄路幽絕鵲鷦鷯立如人銜魚避船偷眼嗔
天開獵夫會尋汝乘時早可收其身

土兵行

豫章城樓飢啄烏黃狐跳踉追赤狐北風北來江怒湧

土兵攫人人叫呼城外之民徙城內塵埃不見章江途
花裙蠻奴逐婦女白奪釵鐲換酒沽父老向前語蠻奴
慎勿橫行王法誅華林姚源諸賊徒金帛子女山不如
汝能破之惟汝欲犒賞有酒牛羊猪大者陞官佩綬趨
蠻奴怒言萬里入爾都爾生我生屠我屠勁弓毒矢莫
敢何意氣似欲無彭湖彭湖翩翩飄白旗輕舸蔽水陸
走車黃雲捲地春草死烈火誰分瓦與珠寒崖日月豈
盡照大邦鬼魅難久居天下有道四夷守此輩可使亦

可虞何況土官妻妾俱美酒大肉吹笙等

癸酉生日

廬山臘日地凍裂白猿鹿麕啼深雪卧病松林北岸湖
黃蒿古阪行人絕已今行年四十二我辰安在百憂結
小孫呼爺戲牀側縱惱忍能即嗔說

豆莖行

昨當大風吹雪過湖船無數冰打破冰驤蟲崑山嶽立
行人駭觀淚交墮景泰年間一丈雪父老見之無此禍

鄱陽十日路斷截廬山百姓啼寒餓旌竿凍折鼙鼓啞
浙軍楚軍袖手坐將軍部兵蔽江下飛報沿江催豆莖
邑官號呼手足皴馬騾雞犬遺眠卧前時邊達三千軍
五箇病熱死兩箇彎弓值凍不敢發昔何猛毅今何懦
李郭鄴城圍不下裴度淮西手可唾從來強弱不限域任
人豈論小與大當衢寡婦攜兒哭秋禾枯槁春難播縱
健徵科何自出大兒牽羶陸挽馱

餘干行

荒濱鵲立夕啼鵲春行緣岸竹木枯黃蒿破屋走白狐
東至信州西鄙湖男兒輸粟婦刈芻問誰為此軍前須
去年冰雪十丈餘凋瘵至今猶未蘇姚源帶甲已數萬
巖淤莫展金僕姑近聞殺官兵復北道路諠傳真有無
安能飛刀取賊顱貂裘白馬還京都

義魚行

漢江七月黃水漲男婦義魚立江上岸斜波緊煦泡轉
千人目側睛相向巧者十義五義中血飛銀尺翻金浪

編魚中义獨更穩頓之泥沙半倔强我舟其時行邁此
仰視黃天色惆悵深山藥苗孰流汝一毒江河萬形喪
鯨鮪糜爛不直錢小瑣暴棄同蚘蟻走鯢吞泓若山滾
蹴踏猶能開浩蕩渡子徒誇好身手如飛快槩誰曾傍
夜風大聲吼盤渦地坼瀕洞厖鼉鼉如甕之蛟手可得
蛇龍豈復安巢窩消息定理魚奈何

襄陽歌

烈風夜行峴山道天陰城空鬼鳴嘯蒹葭委折波濤白

通濟橋頭老鷄叫人言黃昏虎搏牛牛虎兩傷歸各憂
萬事豈爾能前謀不如置之寬且休君不見百足之蟲
光如虹雷火燒死枯樹中

其二

峴石巉巖孤根深下盤厚土雲氣陰中有千萬竅突如
風來遇之如笙琴昨當醉狂推撼此天地忽然為之動
山鳴鬼哭百獸吟我時便欲驅使六丁移之去家遙屋卑
無頓處於乎一石且無頓處徘徊歸來日沈樹

其三

襄陽山勢何所似東如翥鳳西虎蹲墓堆纍纍不空地
於中豈少英雄魂大堤先前花艷時朱樓細柳黃金羈
但看舊園歌舞處掘發金釵知是誰君今有酒不飲恨
不駟馬軒車馳縱及金張許史將焉為身後埋沒蒿草
疇見知

其四

昨來三日雨不佳逢人面色如地皮老龍之堤豈易打

襄陽難是養魚池南倒江勢雖洶湧我堤如山撼不動
但慮禍患起細微丁寧疆吏防螻孔我聞斯地連年乖
雨暘二麥乾死秋禾傷衆心詢詢久未定小兒何得跳
商羊天公好生民壽康

苦雨篇

波濤日陷蛙鳴起梁園一夜滿城水屋廬半塌塌人死
可憐哭聲水聲裏憶昨出飲黃昏歸零濛已灑力尚微
豈知中宵鬼神怒雷翻電滾雨如注我時怵惕不得眠

牕燈撲殺無計燃沟湧一任霹靂走恍惚若有蛟龍纏
地軸震仄久益急披衣起坐坐復立雞鳴氣勢幸稍緩
積漸天明日光入琴沾書濕開我堂二儀高下雲低昂
黃鸝晒翅燕語梁前何恐懼今何康萬事夷險誰豫量
及時弗樂頭顱蒼

苦雨後篇

小兒嚙啞始學語育之後屋逢今雨包裹移置夜我旁
兒驚屢叫安之乳霆雷競競屋瓦震疾電繞牀亂走鼠

大兒明農隅城住卽有緩急誰視汝旦日報至心則降
雨未傷人傷稷黍前時三月點雨無大兒憂色禾半枯
日日望雨雨反荼盪然猷畝為江湖天晴微風波水動
溝渠四注長河湧明晦反覆何代無囑兒更備宜秋種
久雨東黃子

微晴見月月仰瓦城中水淹雨猶下郊園浹旬不一出
不畏衝泥畏沒馬苔蘚自上匡氏壁蓬蒿日深仲蔚舍
人言甲子船入市幸君豫問能舟者

初雨夏
甲子也

種竹

自從有竹水爛死使我竟日顏不歡頃來移置復傍此
遽覺六月回秋寒龍姿鳳苞生不易可憐蕪沒今人棄
窈窕郊園草樹中何人道有凌雲器

放蛇引

花蛇錯落五色備毀垣掘出蛇驚悸昂頭宛頸若有訴
盤旋瞥睨如奔避深山大澤豈無窟荒郊短草真何意
豺虎公然白晝行花蛇何得更縱橫祇知毒口能戕物

未解皇天實好生洪流自古容微細
吾叱園丁縱蛇逝風驅雷霆急雨過
彩虹倒掛青天霽

歲暮四篇

天霜草枯風波濤愚心恐懼賢心勞
羣聚飢獸野鳴號高飛路逆鴻嗷嗷
有狐河梁閒且得冰行綏綏奈爾曹

其二

百騎橫矛血提刀我軍菜色馬蝟毛
誰謂河廣不容舠北旗獵獵風黃蒿
可憐十羊抗一虎塵沙暗河暮淮浦

其三

長風烈烈吹山寒有松瑟瑟山之端鋪毳布蔭芘小草
霜勢雪力莫可干皐蘭晚蕙日摧隕美而不遇良可嘆

其四

枯蓬飛沙原野昏律窮物慘生意存向夕氣嚴扃我門
霜白月凍啼夜鷗圍爐煨芋啖濁酒有話細與妻兒論
徒涉嘆

兩山欲交水斷破洪川無梁日漸墮徒涉紛紛江復深

鼉喧龍鬬真愁心無言旣濟平安子得路回看轉不禁
君不見岸風翻翻卷瓠葉皇天倘賜築巖楫

松泉子歌

顛崖欽岑撐一松鐵榦屈曲如老龍精靈歲久發光彩
寒蕤古翠芙蓉峯石泉清泠日漱洗汨漉瑟颼松風裏
山人何年住其側手劬茯苓煮泉水近來瀟灑落風塵
賣藥救世能通神我勸山人且勿歸金鑰玉珪行陽春

飛星篇

十月廿七昏尚坐一星出垣如斗大碎光萬點長燭天
軒牖盡明向西墮俗子蒙頭不讀書魯人鐘鼓拜爰居
天道悠悠誰復知世間魚目為明珠

吟思翁

吟思翁翁我思蒼松碧梧世希有海月紅雲如見之孤
鶴引唳志在萬里吞舟之魚豈遊涔水嗟嗟噫嘻我思
者翁翁思者何停雲日暮滄溟波

鈴山堂歌

先生昔隨玄豹住丹壑冥濛日烟霧先生今與赤龍飛
南望碧山空翠微茅堂蒼蒼雲氣入囊琴鎖戶陰陰濕
沍蘭沙溫春鳥暮庭松月清夜鶴立君不見山下石崕
嵒千尺磯經年不釣苔成衣玉璜羊裘各有分可問王
孫歸不歸

空同集卷十九